



Broj: 03/1-50-14-7-16/25

Sarajevo, 29. 9. 2025.

ČLANOVIMA ZAJEDNIČKE KOMISIJE ZA ODBRANU I SIGURNOST BiH:

JASMINU IMAMOVIĆU, MARINI PENDEŠ, DARKU BABALJU, MILANU DUNOVIĆU, SLAVKU MATIĆU, ŽELIMIRU NEŠKOVIĆU, SANJI VULIĆ, ŠERIFU ŠPAGI, KEMALU ADEMOVIĆU, SREDOJU NOVIĆU, ZDENKU ĆOSIĆU, SAFETU SOFTIĆU

PREDMET: Informacija o terenskoj posjeti članova Zajedničke komisije za odbranu i sigurnost BiH jedinicama i komandama OSBiH, Terenskom uredu Granične policije Jug - Čapljina i Agenciji za školovanje i stručno usavršavanje kadrova

Zajednička komisija za odbranu i sigurnost BiH, u svojstvu nadležne komisije Parlamentarne skupštine BiH i u skladu sa usvojenim Orijentacionim radnim planom za 2025. godinu, posjetila je 10. 7. 2025. Komandu 4. pješadijske brigade OSBiH u Čapljini, Terenski ured Granične policije Jug u Čapljini te Agenciju za školovanje i stručno usavršavanje kadrova u Mostaru.

U terenskom obilasku i radnoj posjeti komandi i agencijama učestvovali su: Jasmin Imamović, predsjedavajući, Milan Dunović i Šerif Špago, članovi Zajedničke komisije, Boško Šiljegović, parlamentarni vojni povjerenik BiH, Ljiljana Milićević, sekretarka, Josip Zovko, stručni savjetnik, i Sanja Čavarkapa, stručna saradnica u Uredu sekretara Zajedničke komisije. Također, uz delegaciju Zajedničke komisije za odbranu i sigurnost BiH u terenskoj posjeti su učestvovali i Gordana Živković, sekretarka Doma naroda, Dražen Mustapić, sekretar Predstavničkog doma, i Mirza Imamović, sekretar Zajedničke službe Sekretarijata Parlamentarne skupštine BiH.

Radna posjeta članova Zajedničke komisije za odbranu i sigurnost BiH jedinicama i komandama OSBiH i agencijama realizirana je uz podršku Misije OSCE-a u BiH s ciljem unapređenja demokratske kontrole i parlamentarnog nadzora sektora odbrane i sigurnosti.

1. Terenska posjeta Komandi 4. pješadijske brigade OSBiH – Čapljina

Članovi Zajedničke komisije za odbranu i sigurnost BiH, predvođeni predsjedavajućim Jasminom Imamovićem, 10. jula 2025. godine posjetili su Komandu 4. pješadijske brigade Oružanih snaga BiH u Kasarni „Božan Šimović“ u Čapljini.

Predsjedavajući Zajedničke komisije Jasmin Imamović predstavio je ciljeve posjete, istaknuvši da Komisija želi sagledati trenutno stanje u brigadi i razgovarati o pitanjima obuke, personala, logistike, skladišta naoružanja i međusobnih odnosa. Podsjetio je na raniju posjetu Zajedničke komisije ovoj brigadi prije tri godine, kada je na njenom čelu bio general Rezo, te da su tadašnji utisci bili pozitivni. Naglasio je da izvještaji parlamentarnog vojnog povjerenika ukazuju na poboljšanja, ali da su idalje prisutni izazovi. Posebno je istaknuo značaj otvorenog dijaloga radi pružanja adekvatne podrške unapređenju kapaciteta Oružanih snaga BiH.

Domaćin posjete bio je brigadni general Slaven Blavicki, komandant 4. pješadijske brigade OSBiH. Sastanku su prisustvovali i načelnik Zajedničkog štaba OSBiH generalpukovnik Gojko Knežević, zamjenici načelnika Zajedničkog štaba OSBiH generalmajor Tomo Kolenda i generalmajor Mirsad Ahmić, komandant Operativne komande OSBiH generalmajor Mirzet Lubenović, predstavnici Misije OSCE-a u BiH i Štaba NATO-a u Sarajevu.

Komandant 4. pješadijske brigade OSBiH brigadni general Slaven Blavicki održao je informativni brifing koji je obuhvatio osnovne informacije o lokaciji Kasarne „Božan Šimović“ u Čapljini, shemu rasporeda i strukturu brigade, popunjenost personalom, realizaciju obuke te učešće pripadnika brigade na međunarodnim vježbama u Republici Srbiji i Republici Hrvatskoj. Predstavljeno je i stanje infrastrukture koje je u proteklom periodu poboljšano adaptacijom objekata čuvarske službe, uvođenjem videonadzora, te trenutnom sanacijom krovne konstrukcije na određenim objektima. Istaknut je problem popunjenosti personalom, što dovodi u pitanje izvršavanje zadataka, kao i odliv personala u narednom periodu radi penzionisanja. Problem predstavlja i nabavka osnovnih materijalno-tehničkih sredstava za uređenje kruga kasarne i zaštitu od požara.

General Blavicki je naglasio da, uprkos izazovima, brigada ulaže velike napore u izvršavanje postavljenih zadataka, iskazujući odlučnost, profesionalnost i predanost misiji. Ponovo je istaknuta ključna uloga podrške u modernizaciji opreme i poboljšanju uslova života i rada, što je esencijalno za efikasno funkcioniranje sistema odbrane.

Parlamentarni vojni povjerenik Boško Šiljegović informirao je prisutne o prigovorima pripadnika OSBiH i postupcima koji se preduzimaju na njihovom rješavanju, naglašavajući značajan doprinos brigade u zadacima civilno-vojne saradnje, te pohvalio aktivnosti Zajedničkog štaba OSBiH u otklanjanju nepravilnosti, procesu ocjenjivanja profesionalnih vojnih lica, izboru kandidata za kategoriju podoficira i oficira, kao i donošenju Kodeksa o korištenju društvenih mreža i online platformi.

U završnom obraćanju načelnik Zajedničkog štaba OSBiH generalpukovnik Gojko Knežević zahvalio se prisutnima na konstruktivnoj raspravi, ističući profesionalizam pripadnika brigade uprkos izazovima. Potvrdio je da Zajednički štab OSBiH stoji iza svih iznesenih problema, posebno finansijskih, logističkih i problema s nabavkama. Naglasio je da su poboljšanje uslova života i rada vojnika, te modernizacija opreme, ključni za operativnu sposobnost OSBiH. Izrazio je zahvalnost Zajedničkoj komisiji za odbranu i sigurnost BiH na volji da se aktivno uključi u rješavanje ovih problema, izražavajući uvjerenje da će zajedničkim radom svih aktera biti stvoreni bolji uslovi za vojnike i ojačan odbrambeni sistem BiH.

Nakon završetka sastanka, članovi Komisije i prisutni obišli su krug kasarne i prisustvovali zajedničkom ručku u vojničkom restoranu.

2. Posjeta Terenskom uredu Granične policije Jug - Čapljina

Delegacija Zajedničke komisije za odbranu i sigurnost BiH predvođena predsjedavajućim Jasminom Imamovićem posjetila je i Terenski ured Granične policije BiH Jug u Čapljini, gdje su o radu ovog terenskog ureda razgovarali sa zamjenikom direktora Granične policije BiH Ensadom Kormanom i načelnikom Terenskog ureda Jug Josipom Šakom.

Načelnik Terenskog ureda Jug Granične policije BiH, glavni inspektor Josip Šako, predstavio je nadležnosti i organizaciju ovog ureda sa sjedištem u Čapljini, koji pokriva područje devet općina u dva entiteta i dva kantona, uz granicu s Republikom Hrvatskom i Crnom Gorom, ukupne zone odgovornosti od 306 kilometara. Izložio je strukturu jedinica ureda (Čapljina, Trebinje, Neum i Doljani), stanje kadrovske popunjenosti (oko 74%), pri čemu je posebno naglasio problem nedostatka policijskih službenika i veliki broj odlazaka u penziju, što otežava efikasno izvršavanje zadataka. Posebno je naglasio da sedam od 19 prijelaza zadovoljava evropske standarde, kao i da se na četiri lokacije ostvaruje zajedničko djelovanje s policijskim službenicima Hrvatske i Crne Gore. Šako je istaknuo značaj međudržavne i međuagencijske saradnje, uključujući rad Zajedničkog centra za policijsku saradnju u Trebinju i kontakt-centra na MGP Bijača. U svom izlaganju prezentirao je statističke podatke za prvih šest mjeseci 2025. godine, uključujući broj evidentiranih putnika, broj odbijenih ulazaka u BiH, pronalazak lica po potragama, te smanjenje broja ilegalnih prelazaka u odnosu na prethodnu godinu.

Izvijestio je o otkrivenim krivičnim djelima, među kojima su krijumčarenje opojnih droga, ljudi i duhanskih proizvoda, navodeći konkretne zapljene, poput spriječene dostave više od 600 kilograma marihuane i desetina hiljada kutija cigareta bez akciznih markica. Također je naglašeno da policijski službenici koriste savremenu specijalističku opremu, službena plovila, termovizijske kamere i službene pse, te da se granična sigurnost dodatno osigurava postavljanjem zapreka na rizičnim lokacijama i mješovitim patrolama sa susjednim zemljama.

Tokom sastanka razgovaralo se o potrebi za obukom i zapošljavanjem novih graničnih policajaca, poboljšanjem teških uslova rada na graničnim prijelazima, kao i o saradnji s drugim agencijama unutar Ministarstva sigurnosti BiH i entitetskim MUP-ovima. Također je razgovarano i o potrebi poboljšanja zakonske legislative s ciljem omogućavanja efikasnijeg rada Granične policije BiH.

3. Terenska posjeta Agenciji za školovanje i stručno usavršavanje kadrova

Na kraju dana delegacija Zajedničke komisije za odbranu i sigurnost BiH posjetila je sjedište Agencije za školovanje i stručno usavršavanje kadrova u Mostaru, gdje su se u razgovoru s menadžmentom Agencije upoznali s radom i rezultatima ove institucije.

Direktor Agencije Marko Vujević i zamjenik direktora Marko Šupljeglav govorili su o organizaciji i realizaciji osnovnih i specijalističkih obuka koje Agencija provodi za policajce, policijske službenike i druge stručnjake iz policijskih agencija iz sastava Ministarstva sigurnosti BiH, entitetskih i kantonalnih MUP-ova, te drugih institucija BiH. Istaknuto je da je Agencija do sada odškolovala četiri generacije polaznika po standardima EU i FRONTEX-a, te da su inspektori FRONTEX-a učestvovali na tri organizirane specijalističke obuke. Posebno je naglašen pilot-projekat realiziran u saradnji s NATO-om u oblasti borbe protiv terorizma.

Direktor je predstavio i godišnji plan obuka koji uključuje 150 polaznika iz Granične policije BiH, 50-70 polaznika Direkcije za koordinaciju policijskih tijela, 30-40 polaznika SIPA-e i drugih agencija, a sve u skladu s planovima obuka koje dostavljaju nadležne institucije. Ukazao je i na aktuelne rasprave o zakonskom okviru, posebno u vezi s pitanjem odlaska u penziju policijskih službenika, naglašavajući da bi bilo važno izbjeći rani odlazak obučanih kadrova. Također je istaknuo problem kašnjenja u upućivanju pripadnika Granične policije BiH na predviđene obuke, što može imati uticaj na pravovremenu realizaciju planiranih aktivnosti.

Tokom sastanka članovi Zajedničke komisije izrazili su zadovoljstvo stanjem i radom Agencije, kao i infrastrukturom i opremom za obuke kojom ona raspolaže.

Predsjedavajući Zajedničke komisije
Jasmin Imamović

Dostavljeno:

- naslovu
- a/a